

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 54/3

15 դեկտեմբերի 2015 թ.

Քննարկվեց «Դիրիժար» ՍՊԸ 16.11.2015 թ-ի բողոքը ՀՀ ԿԱ ՖՆ իրավաբանական վարչության պետի 04.09.2015 թ-ի թիվ 292 որոշման դեմ:

«Դիրիժար» ՍՊԸ-ի բողոքում բերված փաստարկները.

Սույն թվականի սեպտեմբեր 28-ին Հայփոստից ստացվել է ՀՀ ՖՆ Իրավաբանական վարչության պետի կողմից 04.09.2015 թ-ին կայացրած թիվ 292 որոշումը, որտեղ նշված է՝ 04.09.2015 թ-ի դրությամբ «Դիրիժար» ՍՊԸ-ի (այսուհետ նաև ընկերություն) չկատարած հարկային պարտավորությունները կազմում են 6.689.470 դրամ, պետական տուրք 6.686.233 դրամ, որից ապառք 730.000 դրամ, տույժ 5.956.233 դրամ, որոնք ենթակա են գանձման:

Վերոնշյալ որոշման մեջ, սակայն, նշված չէ ոչ 6.689.470 դրամի առաջացման ժամանակահատվածը, ոչ էլ հիմքերը:

Ընկերությունը տեղեկացնում է, որ պետական տուրքը վճարել է սահմանված ժամկետում, հետևապես այդ մասով պարտավորություններ ունենալ չի կարող: Ինչ վերաբերվում է 4.285.687 դրամ տույժին, ապա դրա վերաբերյալ առկա է օրինական ուժի մեջ մտած ՀՀ Վարչական դատարանի 2013 թ-ի թիվ ՎԴ/0234/05/13 վարչական գործով վճիռը, որի համաձայն ՀՀ ՊԵԿ Մաշտոցի հարկային տեսչության հայցն ընդդեմ «Դիրիժար» ՍՊԸ-ից գումար բռնագանձելու մասին պահանջը մերժվել է:

Ուստի ելնելով վերոգրյալից և ղեկավարվելով «Հարկային ծառայության մասին» ՀՀ օրենքի 43 հոդվածով և «Վարչարարության հիմունքների և վարչական վարույթի մասին» ՀՀ օրենքի 69, 70 հոդվածի 2-րդ կետի բ) ենթակետով, ընկերությունը խնդրում է վերանայել ՀՀ ՖՆ Իրավաբանական վարչության պետի 04.09.2015 թ-ի թիվ 292 որոշումը, ինչպես նաև վերահաշվարկել «Դիրիժար» ՍՊԸ-ի հարկային պարտավորությունները և հանել գույքի և դրամական միջոցների վրա դրված արգելանքը:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով «Դիրիժար» ՍՊԸ-ի վերաբերյալ վարչական վարույթի նյութերը պարզել է, որ 04.09.2015 թ-ի դրությամբ ընկերության չկատարված հարկային պարտավորությունները կազմում են 6.689.470 դրամ, որից պետական տուրք 6.686.233 դրամ, այդ թվում ապառք՝ 730.000 դրամ, տույժ 5.956.233 դրամ:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ,

56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության պետի կողմից 04.09.2015 թ-ին ընդունվել է թիվ 292 որոշումը (այսուհետ նաև Որոշում) «Դիրիժաբլ» ՍՊԸ-ից 6.689.470 դրամ պարտավորության գումար գանձելու մասին:

Քննարկվող դեպքում «Դիրիժաբլ» ՍՊԸ-ից 6.689.470 դրամ պարտավորության գումար գանձելու մասին Որոշում կայացվելու համար հիմք է հանդիսացել այն հանգամանքը, որ ըստ «Հարկատու 3» համակարգում առկա տվյալների, 04.09.2015 թ-ի դրությամբ ընկերության չկատարված հարկային պարտավորությունները կազմել են 6.689.470 դրամ: Սակայն հետագայում ընկերության պարտավորությունների ուսումնասիրության և դրա հետևանքով անձնական հաշվի քարտում համապատասխան փոփոխություններ կատարելու արդյունքում պարզվել է, որ 04.09.2015 թ-ի դրությամբ ընկերությունը չկատարված պարտավորություններ չունի: Մասնավորապես, համաձայն ՀՀ ՖՆ Մաշտոցի ՀՏ պետի 11.11.2015 թ-ի գրության «Դիրիժաբլ» ՍՊԸ-ի պետական տուրքի անձնական հաշվի քարտի էլեկտրոնային և թղթային տարբերակներում առկա անհամապատասխանությունը պայմանավորված է եղել ծրագրային խնդիրներով՝ կապված ընկերության կողմից վճարված գումարները «Հարկատու 3» համակարգում նպատակային կարգավիճակի վերաձևակերպման հետ: Ըստ գրության, համապատասխան ուղղումներ կատարելու արդյունքում ընկերությունը 04.09.2015 թ-ի դրությամբ պետական տուրքի գծով պարտավորություն չունի: Այսինքն, «Դիրիժաբլ» ՍՊԸ-ի պետական տուրքի գծով պարտավորությունների վերահաշվարկման հետևանքով վերացել է նաև ՀՀ ՖՆ իրավաբանական վարչության պետի 04.09.2015 թ-ի թիվ 292 որոշման մեջ մատնանշված պարտավորության գանձման անհրաժեշտությունը:

Ինչ վերաբերվում է «Դիրիժաբլ» ՍՊԸ-ի բողոքով բերված պահանջին՝ կապված ընկերության գույքի և դրամական միջոցների վրա դրված արգելանքը հանելու հետ, ապա նշվեց, որ 04.09.2015 թ-ի դրությամբ ընկերությունում պետական տուրքի գծով պարտավորություններ առկա չլինելու հարցը պարզաբանվելուց հետո, նշված արգելանքը հանվել է:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

Չեղյալ համարել ՀՀ ԿԱ ՖՆ իրավաբանական վարչության պետի 04.09.2015 թ-ի թիվ 292 որոշումը:

Հանձնաժողովի նախագահ՝


Վ.ՄԻՐՈՒՄՅԱՆ

